

共同經課 - 1

創世記四十五章一節~十五節

1 約瑟 tī hiah-ê khiā 伊身邊 ê 人 ê 面前忍 boē-tiâu；就 hoah 講，眾人 tiòh 離開我出去。約瑟將伊本身 hō 兄弟認得 ê 時，無一人 khiā tī 伊 ê 面前。2 伊就出聲大哭；埃及人聽見，法老 ê 家亦聽見。3 約瑟 kā 伊 ê 兄弟講，我是約瑟，我 ê 老父 iáu tī-teh mah？伊 ê 兄弟 boē 能應，因為 tī 伊 ê 面前 lóng 驚惶。4 約瑟 koh kā 伊 ê 兄弟講，請行 oá 來。In 就 oá 來。伊講，我是 lín ê 小弟約瑟，就是 lín 所賣到埃及 ê。5 Taⁿ m̄ 免因為賣我到 chia 來憂悶，來家已怨恨；這是上帝差我事先 lín 來，因為 beh 保全性命。6 Taⁿ tī chit 所在 ê 飢荒已經兩年，iáu 有五年，無 thang 種作，無 thang 收成。7 上帝差我事先 lín 來，為 tiòh beh kā lín 留 chhun ê 種族 tī 世上；koh beh 行伊大 ê 拯救，保全 lín ê 活命。8 Án-ni 看起來，差我到 chia ê，m̄ 是 lín，就是上帝；伊 koh hō 我親像法老 ê 父，做伊全家 ê 主，kap 管理埃及全地。9 Lín tiòh 趕緊上去我 ê 老父 hia，kā 伊講，你 ê kiáⁿ 約瑟 án-ni 講，上帝 hō 我做全埃及 ê 主，請落來我 chia，m̄-thang 延 chhiân。10 你 kap 你 ê kiáⁿ 你 ê 孫，kap 牛群羊群，以及一切所有 ê，lóng thang 來 tiàm-tī Ko-san ê 地，kap 我相近。11 我 beh tī-hia 奉承你；因為 iáu 有五年 ê 飢荒，免得你，kap 你 ê 家眷，kap 一切所有 ê 落薄。12 何況 lín ê 目矙 kap 我 ê 小弟便雅憫 ê 目矙 lóng 看見我 kap lín 親嘴對 lín 講話。13 Lín 也 tiòh 將我 tī 埃及一切 ê 榮光 kap lín 所看見 ê 事，lóng kā 我 ê 老父講；koh tiòh 趕緊將我 ê 老父搬來我 chia。14 Tùi án-ni，約瑟仆 tī 伊 ê 小弟便雅憫 ê 頷頸啼哭；便雅憫也 tī 伊 ê 頷頸啼哭。15 伊 koh kap 眾兄弟 chim 嘴，抱 in 啼哭；後來伊 ê 兄弟就 kap 伊講話。

共同經課 - 2

詩篇一百三十三篇

1 上崎 á ê 詩；大衛所做。1) 看 ah，兄弟和好相 kap khiā 起，是何等 ê 好，何等 ê 安樂！2 這 thang 比並 hit-ê 貴氣 ê 油 thîn tī 頭殼頂，流到嘴鬚，就是亞倫 ê 嘴鬚，Koh 流到伊 ê 衫 á 裾。3 也 thang 比並 Hek-bùn ê 露水，落 tī 錫安 chiah-ê 山；因為 tī-hia 耶和華有定 tiòh 賜福，就是永遠 ê 活命。

共同經課 - 3

羅馬書十一章一節~二 a 節，二十節~三十二節

1 我就講，上帝 kiám 有棄 sak 伊 ê 百姓 ah？斷斷 m̄ 是。因為我也是以色列人，出 tī 亞伯拉罕 ê 後裔，便雅憫 ê 支派。2 上帝未 bat 棄 sak 伊所事先知 ê 百姓。20 Tiòh in tùi m̄ 信 chiah at-起來，你 tùi 信 chiah khiā-tiâu。21 心莫得自高，tiòh 驚惶。因為上帝若無保借順性 ê 枝，也 beh 無保借你。22 Tiòh 看上帝 ê 慈悲 kap 嚴謹；款待 hiah-ê 跋倒 ê，是嚴謹；但是款待你是上帝 ê 慈悲，總是你 tiòh 長長 tiàm-tī 伊 ê 慈悲；若無，也 beh kā 你割起來。23 Koh in 若 m̄ 是長長 tiàm-tī m̄ 信，也 beh 得 tiòh 接；因為上帝會 koh 接 in。24 因為你若 tùi hit-ê 順性做山橄欖 ê 既然割起來，逆性來接 tī 好 ê 橄欖，何況 hiah-ê 順性 ê 枝 beh 接 tī 本舊 ê 橄欖 ah？25 兄弟 ah，我 m̄-ài lín m̄ 知 chit-ê 奧妙，免得 lín 家已掠做智慧；就是以色列中有 ê 成做硬心，thèng 候外邦滿滿進入；26 án-ni thong 以色列 beh lóng 得救，照所記載講，beh 有救主 tùi 郇城出，改除雅各 ê 不虔；27 Koh 我除去 in ê 罪 ê 時，這就是我 kap in 所立 ê 約。28 照福音，就 in 為 tiòh lín 來做仇 siû；照揀選，就 in 為 tiòh 列祖來得 tiòh 疼。29 因為上帝 ê 恩賜 kap 召人 lóng 無退悔。30 是親像 lín 前無順服上帝，但是 taⁿ 對 in ê 無順服 lín 得 tiòh 憐憫，31 án-ni in taⁿ 無順服，thang tùi lín ê 得 tiòh 憐憫，hō in 亦得 tiòh 憐憫。32 因為上帝已經圍萬人 tī 無順服 ê 中間，tiâu-tí beh 憐憫萬人。

共同經課 - 4

馬太福音十五章(十節~二十節)二十一節~二十八節

10 就叫眾人來，kā in 講，Lín tiòh 聽來曉悟。11 m̄ 是 tùi 嘴入 ê 話 hō 人污穢；就是 tùi 嘴出 ê，chit-ê 話 hō 人污穢。12 Hit 時學生就近來 kā 伊講，法利賽人聽見 chit-ê 話，真 m̄ 願，你知 mah？13 伊應講，見若栽種 ê 物 m̄ 是我 ê 天父所栽種 ê，beh 拔伊 ê 根。14 chhut-chāi in；in 是 chhiⁿ-mî teh chhoā 路 ê。若是 chhiⁿ-mî kā chhiⁿ-mî ê chhoā 路，兩個 teh-beh 跋落陷坑。15 彼得應伊講，Chit-ê 譬喻，請 kā 阮解明。16 伊就講，Lín 亦 iáu-kú bē 曉悟 mah？17 Kiám boē 曉得，見若 tùi 嘴入 ê，落 tī 腹肚，來放 tī 廁池 ah？18 若是 tùi 嘴出 ê；是 tùi 心內發出；chiah-ê hō 人污穢。19 因為 tùi 心發出 phaiⁿ 念頭，行兇、姦淫、私通、偷 thèh、lām-sám 干證、謗瀆；20 chiah-ê 是 hō 人污穢；若是無洗手來食，boē hō 人污穢。21 耶穌 tùi hia 出去退去到 Chhui-lo5Se-tùn ê 境界。22 Tú-tng 有迦南 ê 婦人人出 in ê 交界，喉叫講，主 ah，大衛 ê 後裔，憐憫我；我 ê cha-bó-kiáⁿ 患 tiòh 鬼，真艱苦。23 耶穌無應伊一句。伊 ê 學生來，求伊講，Tiòh kah 伊去，因為伊 tī 咱 ê 後面 teh 喉叫。24 伊就應講，我奉差，無 m̄ 是就近以色列家失落 ê 羊 nā-tiāⁿ。25 婦人人來拜伊講，主 ah，幫贊我。26 若是伊講，Thèh kiáⁿ 兒 ê 餅，hiat hō 狗 á，是 m̄ 合。27 婦人人講，主 ah，tiòh；因為連狗 á 亦會得食 in ê 主人桌腳 ka-lauh ê 餅幼。28 Tùi án-ni 耶穌應講，婦人人 ah，你 ê 信大 lah；照你所 ài ê，kā 你做成。Tùi hit 時伊 ê cha-bó-kiáⁿ 已經好。